



KOSOVO SPECIALIST CHAMBERS  
DHOMAT E SPECIALIZUARA TË KOSOVËS  
SPECIJALIZOVANA VEÇA KOSOVA

**Numri i lëndës:** KSC-BC-2020-06

**Prokurori kundër Hashim Thaçit, Kadri Veselit, Rexhep Selimit dhe Jakup Krasniqit**

**Vendosi:** Gjykatësi i Procedurës Paraprake

Gjykatës Nikola Giju

**Administratore:** Dr. Fidelma Donlon

**Data:** 30 shtator 2021

**Gjuha:** Anglishte

**Klasifikimi:** Publik

---

**Vendim mbi Kërkesën e Prokurorisë për Zgjatjen e Afatit**

---

**Prokurorit të Specializuar**  
Xhek Smith

**Mbrojtësit të Hashim Thaçit**  
Gregori Kihou

**Mbrojtësit të Viktimave**  
Sajmon Loz

**Mbrojtësit të Kadri Veselit**  
Ben Emerson

**Mbrojtësit të Rexhep Selimit**  
Dejvid Jang

**Mbrojtëses së Jakup Krasniqit**  
Venkatesvari Alagenda

**GJYKATËSI I PROCEDURËS PARAPRAKE**,<sup>1</sup> në përputhje me nenin 39(13) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar (“Ligji”), dhe rregullat 9, 95(2)(b) dhe 102(3) të Rregullores së Procedurës dhe të Provave para Dhomave të Specializuara të Kosovës (“Rregullorja”), nxjerr këtë urdhër.

## I. HISTORIKU PROCEDURAL DHE PARASHTRIMET

1. Më 23 nëntor 2020, Gjykatësi i Procedurës Paraprake urdhëroi, ndër të tjera, që Zyra e Prokurorit të Specializuar (“ZPS”) të jepte një njoftim të hollësishëm të provave sipas rregullës 102(3) të Rregullores (“Njoftimi”) deri të premtën, 30 prill 2021.<sup>2</sup>
2. Më 24 mars 2021<sup>3</sup> dhe 24 qershor 2021,<sup>4</sup> Gjykatësi i Procedurës Paraprake zgjati afatin e ZPS-së për dorëzimin e Njoftimit.
3. Më 31 korrik 2021, ZPS-ja dorëzoi Njoftimin.<sup>5</sup>
4. Më 8 dhe 14 shtator 2021, Gjykatësi i Procedurës Paraprake ndryshoi më tej afatet lidhur me nxjerrjen e materialit të rregullës 102(3) dhe përsëriti se ZPS-ja duhet të nxjerrë ose lejojë qasje në materialin e zgjedhur, ose të parashtojë kërkesë për masa mbrojtëse brenda tri javësh nga njoftimi/njoftimet e Mbrojtjes, si dhe të paraqesë kundërshtimet e veta në lidhje me rëndësinë materiale të materialeve të rregullës

---

<sup>1</sup> KSC-BC-2020-06, F00001, Kryetarja, *Vendim për Caktimin e Gjykatësit të Procedurës Paraprake*, 23 prill 2020, publik.

<sup>2</sup> KSC-BC-2020-06, F00099, Gjykatësi i Procedurës Paraprake, *Vendim Kornizë mbi Nxjerrjen e Provave dhe Çështje lidhur me Të*, (“Vendimi Kornizë”), 23 nëntor 2020, publik, para. 99(f).

<sup>3</sup> KSC-BC-2020-06, Transkript i seancës, 24 mars 2021, publik, f. 390, rreshti 17 deri në f. 391, rreshti 10.

<sup>4</sup> KSC-BC-2020-06, F00370, Gjykatësi i Procedurës Paraprake, *Vendim mbi Kërkesën e Prokurorisë për Zgjatje të Afatit për Dhënien e Njoftimit sipas Rregullës 102(3)*, 24 qershor 2020, publik.

<sup>5</sup> KSC-BC-2020-06, F00421, Prokurori i Specializuar, *Njoftimi i Prokurorisë sipas Rregullës 102(3)*, 30 korrik 2021, publik, me Shtojcën 1, konfidenciale, dhe Shtojcën 2, rreptësisht konfidenciale dhe ex parte.

102(3) të kërkuara nga Mbrojtja, brenda dhjetë ditësh nga njoftimi/njoftimet e Mbrojtjes.<sup>6</sup>

5. Më 21 dhe 24 shtator 2021, Mbrojtja e Hashim Thaçit dhe Mbrojtja e Rexhep Selimit (bashkërisht, "Mbrojtja") kërkuan nxjerrjen e materialit të paraqitur në Njoftim (përkatësisht, "Kërkesa e Thaçit" dhe "Kërkesa e Selimit").<sup>7</sup>

6. Më 29 shtator 2021, ZPS-ja kërkoi nga Gjykatësi i Procedurës Paraprake të miratonte: (i) zgjatje dyjavore të afatit deri më 15 tetor 2021 për paraqitjen e kundërshtimeve mbi rëndësinë materiale lidhur me Kërkesën e Thaçit, dhe deri më 20 tetor 2021 lidhur me Kërkesën e Selimit; dhe (ii) zgjatje të ngjashme dyjavore të afatit përkatës për nxjerrjen e materialit dhe/ose parashtrimin e kërkesave për masa mbrojtëse lidhur me secilën nga kërkesat ("Kërkesa e ZPS-së").<sup>8</sup> ZPS-ja kërkon këto zgjatje të afateve të rregullës 102(3) duke mbajtur parasysh numrin e materialit të kërkuar (rreth gjithsej 600 materiale) dhe afatet e tjera të njëkohshme të rregullës 102(3) që po ashtu kanë të bëjnë me numër të madh materialesh.<sup>9</sup>

## II. DISPOZITAT LIGJORE PËRKATËSE

7. Në pajtim me rregullën 9(5)(a) të Rregullores, nëse i tregohen arsye të vlefshme, ose *proprio motu*, Paneli mund të zgjasë ose shkurtojë afatet e përcaktuara prej Rregullores ose prej Panelit.

8. Në pajtim me rregullën 9(6) të Rregullores, në qoftë se nuk i shkaktohet dëm palës kundërshtare, vendimi mbi një kërkesë për ndryshimin e afatit mund të merret pa i dhënë palës kundërshtare mundësinë për të shprehur mendimin.

---

<sup>6</sup> KSC-BC-2020-06, F00460, Gjykatësi i Procedurës Paraprake, *Vendim mbi Kërkesën e Mbrojtjes për Ndryshim të Njoftimit sipas Rregullës 102(3)*, 8 shtator 2021, publik, para. 27; Transkript i seancës, 14 shtator 2021, publik, f. 625, rreshti 24 deri në f. 626, rreshtat 1-21.

<sup>7</sup> KSC-BC-2020-06, F00497, Prokurori i Specializuar, *Kërkesë e Prokurorisë për Zgjatjen e Afatit ("Kërkesa")*, 29 shtator 2021, publike, para. 2.

<sup>8</sup> Kërkesa, para. 5.

<sup>9</sup> Kërkesa, para. 3.

9. Në bazë të rregullës 95(2)(b), Gjykatësi i Procedurës Paraprake përcakton afatet për nxjerrjen e provave.

10. Rregulla 102(3) e Rregullores përcakton se, në përputhje me nenin 21(6) të Ligjit, Prokurori i Specializuar i jep njoftim të hollësishëm Mbrojtjes për çdo material dhe provë që ka në zotërim. Materiale të tilla nxirren pa vonesë. Prokurori i Specializuar i drejtohet menjëherë Panelit në qoftë se ekzistojnë arsye për kundërshtimin e rëndësisë materiale të informacionit.

### III. DISKUTIM

11. Në lidhje me zgjatjen e kërkuar të afatit, Gjykatësi i Procedurës Paraprake vlerëson se ZPS-së do t'i nevojitet kohë shtesë për përpunimin e numrit të materialeve të identifikuar në Kërkesën e Thaçit dhe Kërkesën e Selimit dhe për përgatitjen e kujdesshme të mocioneve përkatëse për masa mbrojtëse. Gjithashtu, Gjykatësi i Procedurës Paraprake vlerëson se zgjatja e afatit do të mundësonte komunikimet *inter partes* që mund të shmangin kontestimet juridike të panevojshme lidhur me Kërkesën e Thaçit dhe Kërkesën e Selimit.<sup>10</sup>

12. Gjithashtu, meqenëse nxjerrja e materialeve të rregullës 102(3) ende vazhdon dhe zgjatja e kërkuar e afatit do të mundësojë diskutime *inter partes*, me çka mund të shmangen kontestimet e panevojshme mbi rëndësinë materiale të tyre, Gjykatësi i Procedurës Paraprake gjykon se Mbrojtjes nuk i shkaktohet dëm me zgjatjen e afatit të ZPS-së për paraqitjen e kundërshtimeve mbi rëndësinë materiale të materialeve, dhe të afateve përkatëse për nxjerrjen e materialeve dhe/ose për masa mbrojtëse.

13. Në përputhje me sa më lart, Gjykatësi i Procedurës Paraprake konstaton se janë paraqitur arsye të vlefshme që përligjin zgjatjen e kërkuar të afatit.

---

<sup>10</sup> Kërkesa, para. 3.

## IV. VENDIM

14. Për arsyet e lartpërmendura, Gjykatësi i Procedurës Paraprake:

- a) **MIRATON** Kërkesën;
- b) **ZGJAT** afatin e ZPS-së për paraqitjen e kundërshtimeve mbi rëndësinë materiale të materialeve të kërkuara në Kërkesën e Thaçit deri të **premtën, 15 tetor 2021;**
- c) **ZGJAT** afatin e ZPS-së për paraqitjen e kundërshtimeve mbi rëndësinë materiale të materialeve të kërkuara në Kërkesën e Selimit deri të **mërkurën, 20 tetor 2021;** dhe
- d) **ZGJAT** afatin e ZPS-së për nxjerrjen e materialeve dhe/ose parashtrimin e kërkesave për masa mbrojtëse në lidhje me materialet e kërkuara në Kërkesën e Thaçit dhe Kërkesën e Selimit përkatësisht deri të **martën, 26 tetor 2021,** dhe të **premtën, 29 tetor 2021.**

/nënshkrimi/

\_\_\_\_\_  
**Gjykatës Nikola Giju**  
**Gjykatësi i Procedurës Paraprake**

E enjte, 30 shtator 2021  
Në Hagë, Holandë